



**Komunikadu Imprensa**  
**15 Abril 2020**

**Tribunál kontinua hala'ó julgamentu ba kazu urjente sira iha situasaun estadu emerjénsia  
JSMP rekomenda atu utiliza meu sira no kondisaun ne'ebé apropriadu no seguru**

Iha 27 Marsu 2020, Prezidente Repúblika liuhusi Dekretu Prezidente Repúblika, Nú. 29/2020, dekreta Estadu Emerjénsia hahú husi 28 Marsu 2020 to'ó iha 26 Abril 2020 relasiona ho pandemia *virus corona* ka COVID-19 (*Coronavirus Disease 2019*) ne'ebé hamate ema rihun ba rihun iha mundu. Bazeia ba deketu lei ne'e, movimentu públiku no atividade hosi instituisaun hotu-hotu, inklui tribunál sira la bele funsiona hanesan bai-bain durante período ne'e. Mezmu nune'e, tribunál kontinua atende kazu urjente sira hanesan julgamentu sumáriu, primeiru interrogatóriu, kazu ne'ebé arguidu iha hela prezu/detidu iha prizaun no kazu sira ne'ebé tenke hetan desizaun.

"JSMP apresia tribunál sira nia serbisu no husu ba Tribunál Rekursu bele prepara kondisaun ne'ebé apropriadu iha tribunál sira hotu tuir protokolu Organizasaun Saúde Mundiál (WHO) inklui kumpri regra sira prinsipál balun ne'ebé sita iha rezolusaun governu nian kona-ba adopta medida ne'ebé konjuntu ba prevensaun no kontrolu surtu husi virus ida ne'e, nune'e aseguira autór judisiáriu sira bainhira halo serbisu inklui parte hotu ne'ebé envolve," dehan Casimiro dos Santos, Diretór interinu JSMP.

JSMP nia hanoin katak bainhira autór tribunál sira, inklui ema sira ne'ebé partisipa iha julgamentu sente seguru maka julgamentu sira sei kontinua la'ó ho dí'ak no parte interesadu sira nafatin iha direitu asesu ba justisa tuir Artigu 26 Konstituisaun katak ema hotu-hotu iha direitu atu bá tribunál hodi defende nia direitu no interese ne'ebé lei proteje.

Iha parte seluk, JSMP mós observa katak tribunál distritál sira halo adiamentu ba kazu sira ne'ebé sei iha prosesu kontinuasaun no marka fali oráriu julgamentu ba kazu hirak ne'e depoisde estadu emerjénsia. Maibé iha possibilidade estadu emerjénsia ne'e bele hanaruk tan, depende ba situasaun.

Tanba ne'e, husu ba tribunál atu hahú hanoín ona mekanizmu própriu ba tempu naruk nian bainhira tribunál kontinua halo julgamentu ba kazu urjente sira atu nafatin halo tuir estandarte prevensaun ba COVID-19 husi WHO no Ministériu Saúde nian nune'e nafatin serbisu ho seguru. Aleinde ne'e, JSMP rekomenda atu tribunál halo kordenasaun ho instituisaun relevante sira hanesan Polísia, Ministériu Públiku, Defensoria Públiku no Prizaun hodi diskute no estabelese sistema ida seguru hodi bele fasilita prosesu sira. JSMP mós rekomenda atu fornese internet ba autór tribunál sira, liuhusi aumenta kapasidade internet iha kada tribunál sira hodi fasilita julgamentu liuhusi telekonferénsia ka mídia ou meu komunikasaun sira seluk ho efetivu.

Atu hetan informasaun kompletu bele kontaktu:

Casimiro dos Santos

Diretór Interinu JSMP

Email: [casimiro@jsmp.tl](mailto:casimiro@jsmp.tl)

Telefone: 3323883 | 77257466

Website: <http://jsmp.tl/>